

Ahi ! Amors (Conon de Béthune – XIIème s.)



Ahi ! Amors, com dure départie
 Me convenra faire de la meilleur
 Qui onques fust amée ne servie !
 Dieus me ramaint a li par sa douçour,
 Si voirementt com j'en part a dolor !
 Las ! qu'ai-je dit ? Ja ne m'en part-je mie !
 Se li cors va servir Nostre Seigneur,
 Me cuers remaint del tot en sa baillie.

Por li m'en vois sospirant en Surie,
 Car je ne dois faillir mon Créator.
 Qui li faudra a cest besoing d'aïe,
 Sachiez que il faudra a graignor;
 Et sachent bien li grant et li menor
 Que la doit-on faire chevalerie
 Où on conquiert Paradis et honor
 Et pris e los et l'amor de sa mie.

Dieu est assis en son saint iretage;
 Ore i parra com cil le secorront
 Cui il jeta de la prison ombraje,
 Quant il fut mis en la crois que Turc ont.
 Honi soient tot cil qui remanront,
 S'il n'ont poverte ou viellece ou malage !
 Et cil qui sain et jone et riche sont
 Ne poevent pas demorer sans hontage.

Tot li clergé et li home d'eage
 Qui en ausmogne et en biens fais manront
 Partiront tot a cest pelerinage,
 Et les dames qui chastement vivront
 Et loiauté deront deauc qui iront;
 Et s'eles font par mal conseil folage,
 A lasches gens mauvaises le feront,
 Car tot li bon iront en cest voyage.

Dieus ! tant avons esté preus par huiseuse,
 Or i parra qui a certes iert preus;
 S'irons vengier la honte dolereuse
 Dont chascuns doit estre irié et honteus;
 Car a nos tems est perdu li sains lieux
 Ou Dieu soffri por nos morts angoisseuse.
 S'or i laissons nos anemis morteus,
 A tos jors mais iert no vie honteuse.

Poème de Conon de Béthune pour la IIIème croisade prêchée en 1189